

Chantun Grischun fa in'emproma cun social media

Da las tractativas da la regenza grischuna

■ (cc) La regenza grischuna ha concludi – sin fundament d'ina nova strategia da comunicaziun – ina fasa d'emproma d'in onn per social media. A partir dad oz communitgeschan trais commembras e commembers da la regenza sco er set posts da servetsch ed il servetsch da medias da la chanzlia chantunala er sin facebook e twitter.

Social media n'èn betg mo ina schanza per las persunas privatas e per las interpresas da s'unir e da barattar ideas en ina rait electronica. Grazia a social media pon er las autoritads e las administraziuns rinforzar il dialog cun la populaziun. Sistems da rait sco facebook e twitter permettann da communitgar en ina moda simpla e directa cunzunt davart ils cuntengs ed ils servetschs quotidiani dal maun public. «Follower» e «fans» vegnan infurmads exclusivamain sur quests channels. Ma igl è er pussaivel da dumandar scleriments e da dar impuls en questa moda. Las autoritads e las administraziuns daventan meglier e pli svelts cun tanschiblas per las burgaisas e per ils burgais.

La regenza grischuna ha concludi l'onni passà ina nova strategia da comunicaziun che prevesa d'introducir multimedia, d'integrar las mobile media, d'optimar la pagina d'internet www.gr.ch e da far in'emproma cun social media. L'emprima chaussa è gia ademplida; dapi il settember 2012 producescha la chanzlia chantunala dal Grischun sequenzas da film curtas ed actualas davart conclus da la regenza e davart fatschentas interessantas da l'administraziun. Ils films stattan a disposiziun en l'internet sut www.gr.ch, e las collavuraturas ed ils collavurats da las medias pon retrair material filmic en la qualitat da HD mintgamai sut ftp.staka.gr.ch (in pled-clav è necessari). Medemamain è vegnì meglier l'access a la pagina d'internet dal chantun per ils apparats mobils. Cun lantschar ina fasa d'emproma per social media vegn ussa realisada la terza part da la strategia en la pratica.

Las persunas che sa participeschan a l'emproma

A la fasa d'emproma d'in onn sa participeschan trais commembras e commembers da la regenza, set posts da servetsch sco er il servetsch da medias da la chanzlia chantunala. Da vart da la regenza è quai il vicepresident *Mario Cavigelli*, schef dal departament da construcziun, traffic e selvicultura, *Christian Rathgeb*,



Da la regenza fan Mario Cavigelli, Christian Rathgeb e Barbara Janom Steiner diever dal facebook.

FOTO N. SIMMEN

schef dal departament da giustia, segirezza e sanadad, sco er *Barbara Janom Steiner*, scheffa dal departament da finanzas e vischnancas. Cavigelli, Rathgeb sco er Janom Steiner mainan accounts persunals da facebook e da twitter.

Da vart da l'administraziun piglian part a l'emproma la chanzlia chantunala (servetsch da medias) sco er la manadra ed ils manaders dals suandants set uffizis: uffizi per la scola populara ed il sport, uffizi da cultura, Plantahof, polizia chantunala (servetsch da medias), uffizi da vischnancas, uffizi da guaud e privels da la natira sco er uffizi da chatscha e pestga.

Facebook, twitter e youtube vegnan avers a medem temp per l'entira administraziun. Uschia survegnan las collavuraturas ed ils collavurats che n'èn betg participads activamain a l'emproma la pussaivladad da perseguir la fasa d'emproma. Ad occurrenz d'infurmaziun per tut las collavuraturas ed ils collavurats èn gia sa participadas passa 400

persunas interessadas. Il pli tard suenter la fin da la fasa d'emproma decida la regenza davart la cuntinuaziun, davart l'extensiuon u davart l'interrupziun da l'utilisaziun da social media.

Qua sutvart ina survista dals accounts da social media dal chantun:

Facebook

- Mario Cavigelli
- Christian Rathgeb
- Barbara Janom Steiner
- Kanton Graubünden

Twitter

- Mario Cavigelli
- Christian Rathgeb
- Barbara Janom
- Mediendienst KtGR
- Dany Bazzell (uffizi per la scola populara ed il sport)
- Peter Kùchler (Plantahof)
- Kantonspolizei GR
- Thomas Kollegger (uffizi da vischnancas)

– Reto Hefti (uffizi da guaud e privels da la natira)

– Georg Brosi (uffizi da chatscha e pestga)

Youtube

– Kanton Graubünden

Infurmar en moda mobila, multimediala ed en ina rait sociala

Empruvar social media en in'applicaziun quotidiana è la mesira la pli nova dal chantun Grischun per obtegnair ina comunicaziun mobila, multimediala ed en ina rait sociala. Facebook e twitter permettann da communitgar svelts ed en moda orientada al dialog. Las contribuiziuns da film sin gr.ch e sin youtube infurmeschan en ina furma visuala atractiva. E grazia ad ina optimaziun da gr.ch per ils smartphones èsi pussaivel d'avair access da tut temp ed en moda simpla a la purschida plurilingua dal chantun en l'internet, er sch'ins è en viadi.